

Stop per il project a Breil

Artitgel da segundas abitaziuns vala a partir dal mars 2012

DA FLURIN ANDRY / ANR

■ **Il Tribunal federal ha decis che las prescripziuns per limitar las segundas abitaziuns valian gia a partir dals 11 mars 2012. Ils projects che han survegni durant il 2012 il permess e che n'eran betg contestads pon vegnir realisads.**

Il suveran svizzer aveva acceptà ils 11 mars 2012 l'iniziativa da las segundas abitaziuns da *Franz Weber* e da sia organisaziun Helvetia Nostra. Il nov artitgel 75 b en la Constituziun federala prescriba che la cumpart da segundas abitaziuns d'ina vischnanca dastga esser maximalmain 20 pertschient. Ier ha decis il tribunal federal che las prescripziuns per limitar las segundas abitaziuns valian gia a partir da la data da votaziun. La dretgira administrativa grischuna era stada da l'avis che quellas prescripziuns entrian en vigur pir a partir dal 1. da schaner 2013. «La decisiun pertutga mo ils projects da construcziun contestads da Helvetia Nostra u era da privats, en Grischun èn quai var 150 projects – projects ch'èn arrivads fin a Lausanne», han declerà cusseglier guvernativ *Hansjörg Trachsel* e *Carlo Decurtins*, giu-



Cusseglier guvernativ Hansjörg Trachsel ed il giurist Carlo Decurtins (da san.) èn stads surprais da la decisiun dal tribunal federal.

FOTO F. ANDRY

rist per planisaziun territoriala, ier a Landquart als represchentants dals meds da massa, «ils auters projects betg contestads che han survegni fin la fin dal'onn 2012 il permess pon era vegnir realisads.» Per

il project concret a Breil en Surselva vul quai dir ch'el na po betg vegnir bajegià. Decurtins ha agiunt ch'ils 150 patrons da quels projects ch'il tribunal federal ha anc da tractar duessan studegiar sch'els na

veglian betg revocar lur dumondas da bajegiar, «sch'els nun han success a Lausanne ston els surprendre ils custs dal process».